

Date – 29/05/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Cyclone Remal avanga chhiatna thlengah hriat theih chinah mi 28 an thi tih Aizawl DC Office Control Room atanga nemngheh a ni.
2. Mizoram hmun hrang hranga kawlpheha pekna Cyclone Remal-in a tihchhiatte chak taka siamthat hna thawh zel anih thu Power Minister Pu F Rodinglian a sawi.
3. West Bengal-a Cyclone Remal tleh avanga chhiatna thlengah mi paruk an thi.
4. Papua New Guinea-in leimin avanga chhiatna a tawh mekah hian sawrkar laipui chuan chhawmdawlina tur dollar maktaduai 1 a pe dawn.



CYCLONE REMAL

Cyclone Remal avanga thli leh ruah thawk avangin Mizoramah chhiatna nasa tak a thleng a, Aizawl leh a chhehvela ruahsur avanga leiminah mi 28 an thi tih Aizawl DC Office Control Room atanga nemngheh a ni a, thi zingah ruang hmuh loh a la awm nual avangin vawiin hian ruang zawn chhonzawm a ni ang.

Hriat theih chinah Melthum-ah mi 14 an thi a, midang 8 vel chin hriatlohin an la awm thei a, Hlimen-ah mi 4 an thi a, Salem Veng, Aizawl-ah mi 3 an thi a, Falkawn-ah mi 2 an thi a, Lungsei-ah mi 1, Kelsih-ah mi 1, Aibawk-ah mi 2 an thi bawk a, Maubawk-ah mi 1 a thi bawk a ni.

State Disaster Management and Rehabilitation official te chuan mi 10 chuang hmuh a la nih loh thu an sawi a, Central YMA chuan vawiin chawhma dar 9 atangin ruang zawn hna thawk tur hian ruahmanna a siam a, Melthum a-hnatlang turin

1. Saikhamakawn
 2. Kulikawn
 3. Thakthing
 4. Venghnuai
 5. Dam Veng
 6. Model Veng
 7. Central YMA CDRT
 8. NDRF leh
 9. Fire & Emergency Services te ruat an ni a Hlimen-a hnatlang turin :
1. Samtlang
 2. North lungleng

3. Lungleng I Branch leh
4. 1st Bn. MAP te ruat an ni.

Hetihlai hian Tlawng lui nasa taka a len avangin Sairangah chuan chhungkaw 30 vel hmun him lama suanchhuah an ni a, school leh Community Hall ah te an riahna tur siamsak an ni.

Tun ruahsur nasat avang hian Langkaih leh Tut lui te chu a lian nasa hle bawk a, Langlaih lui len vang hian Zawlnuam Bawrai veng a chhungkaw 10 te chu an inthiarchhuak tawh a, chhungkaw 18 te chu tui len belh a inthiarchhuak turin an inralring bawk a, tui lian hian Zawlnuam Bawrai vengchung inkalpawhna lei (Bridge) 1 leh Tripura nen a an inkalpawhna temporary bridge 1 chu a chim pil tawh bawk a ni.

Tut lui lian hian a kam deuh lawk a awm Phaizau khua la chim thleng lo mahse an eizawna lui kam nul (thlai chinna) leh tuikhuah a tichhe nasa hle bawk a ni.

Puan tawh angin Chief Minister Lalduhoma chuan he chhiatna thlenga thi te tan cheng nuai 4 zangnadawmna pek a nih tur thu a lo sawi tawh a, Chief Minister Pu Lalduhoma leh Home Minister, Pu K. Sapdanga, Disaster Minister ni bawk te chuan Melthuma chhiatna thlenna hmun hi nimin khan an tlawh a. Ruang lak chhuah tawh Melthum Presbyterian Kohhran Hall a dah chu puanin an tuam a, ruang lakchhuah tawh zinga Mizo pariat te chu sawrkar ralna (ex gratia), a hmahruai atan Rs. 200,000 theuh an hlan. Mitthi te aiawh hian Melthum Local Council Chairman Pu Saihmingliana'n a dawng a ni.

Tuna ralna an pek bak a dang hi chhiatna report engkim a fel fai hnuah hlan leh tur a ni. Non-Mizo thi te erawh hi chu an bank account ah thunsak tur a ni ang. Ruang la hmuh loh te pawh lakchhuah an nih veleh ralna hmahruai hi pek nghal mai theihin DM & R Department chuan ruahmanna a siam fel sa vek tawh a ni.

President Droupadi Murmu I chuan he chhiatna thlenga thit e a tawrhpuu thu sawiin chhanchhuah hna tluang taka kalpui anih theih nan duhsakna a hlan a ni.

Ram hruaitu dang Vice President Jagdeep Dhankar, Union Home Minister Amit Shah, Congress Party hruaitu Rahul Gandhi leh Mizorama Political Party hrang hrang te chuan he thil thleng pawl an tih thu hi an chhuah a ni.

<><><>

GOVT HOLIDAY

Cyclone Remal siper in Mizoram a nuai avanga khawsak phung nasa taka a tih khaihlak avangin vawiin hian sorkar chawlh puan zui a ni a, sorkar pisa leh zirna in te vawiin a ni hnihna atan khar a ni.

GAD thuchhuah tarlan danin, sorkar pisa leh PSU te khar tur a ni a, amaherawhchu he thilthlenga dept pawimawh, Disaster Management and Rehabilitation, District Administration, Municipalities, Health and Family Welfare, Mizoram Police, Power and Electricity, Public Health Engineering,

Transport, District Treasuries, Public Works Department leh a dangte chu chhawmdawl hna thawk zui tur an ni.

School Education Dept pawhin zirna in zawng zawng khar zui a nih tur thu thuchhuah a siam bawk a ni.

<><><>

WEATHER

Khawchin thlirlawkna Aizawl Meteorological Centre atanga thudawn danin, Cyclone Remal chu a kiang tan tawh a, vawiin hian Mizoramah khua a tha tan tura beisei a ni a, hmun thenkhatah ruah leh thli nasa lutuk lovin a thawk thei naa, harsatna leh leh khawsak phung ti khaihlak khawp khawchhia hmuh lawk a ni lo a ni.

Aizawl Meteorological Centre Director Sudheer Kumar Dwivedi-a chuan naktuk lam atang chuan khua a that chhoh tawh rin a ni a ti.

<><><>

POWER

Power Minister Pu F. Rodinglana chuan Mizoram hmun hrang hranga kawlpheha pekna Cyclone Remal-in a tihchhiatte chak taka siamthat hna thawh zel theih nan Department hotute emergency meeting a neihpui a. Aizawl khawchhunga khawl leh line chhe tam tak chu tukin atang khan ruahsur leh leimin karah siam that hna thawh nghal niin, hmun thenkhat erawh leimin leh ruah sur nasat avanga siam mai harsa awm mahse Department staff ten theihtawpin hna an thawk mek a ni.

Cyclone Remal vang hian tun dinhmuna report dawn danin Aizawl-ah ringawt pawh Feeder 33 zet chawmtu Power Sub-station hmun 10 lai a chhiat avangin veng 60 chuang eng nei lovin an awm a, transformer dahna minin transformer a minpui tel te leh panel board engemaw zat chhia report dawn a ni bawk. Aizawl khawpui chung bakah Mizoram hmun hrang hrang atanga report dawn danin Mamit District ah electric ban leh 33kV line leh 11kV line chhia te, Kolasib District ah 132kV, 33kV leh 11kV engemaw zat chhia te a awm a, meeting huaihawt nih lai thleng hian Mizoram chhim lama District 3 Lunglei, Lawngtlai leh Siaha te eng pek theih a la ni lo. Chhim lam line pek Serchhip District erawh Siatual(via East Lungdar) atangin power pek tawh niin, hmun dang pawh hetiang hian a theih dan ang ang hma lak zel tum a ni.

Minister chuan hmanrua indaihlo te hmun hrang hrang atanga lak khawm dan ngaihtuah a, a tul anga RDSS scheme atang te pawha hmanrua lo pawh a, a rang lama siamthat hna thawh chhunzawm nan hian sum te pawh a awm ang ang zawn nghal ni se a ti a. Hei bakah hianin LT leh HT line chhia hmun tam takah a awm avangin sum awm lo chung pawh a tihdan kawng zawn zel a ni ang a ti. P&E Dept. thawktuten ruahsur karah pawh mahni nunna tana hlauhawm khawpa an thawhnaah lawmthu a sawi a, Department lamin theihtawp chhuaha chawl lova hna an thawh thu hre reng chungin, mipuite pawhin dawhthei taka hrethiam turin a ngen a ni.

Customer Care Centre(CCC) tangkai zawka hman dan tur rel nghal niin, vawiin meeting hi Pu H. Zonunsanga, Engineer-in-Chief, P&E Dept., leh P&E Dept. official dang te nen Power Minister Pu F. Rodingliana chenna inah neih a ni.

<><><>

WEST BENGAL

West Bengal-a Cyclone Remal tleh avanga chhياتna thlengah mi paruk an thi. Ruah leh thli tleh hi 24 Parganas district pahnih, Kolkatta leh a chhehvel district ah te chuan a reh tawh a. Cyclone Remal avang hian South leh North 24 Parganas district-a tuipui kam te chu tuiin a chim nasa hle a ni.

<><><>

LOK SABHA CAMPAIGN

Lok sabha inthlan thawhsarihna atana campaign chuan a vawrtawp a thleng mek a. Ni thum chiah campaign hun a awm tawh a. Parliament bial 57-ah vote thlak a ni dawn a. State leh Union Territory pasarihah te June ni 1 ah vote thlak a ni ang. Inthlan thawhsarihnaah hian a vaiin candidate 904 an awm a ni.

Prime Minister Narendra Modia chuan nimin khan West Bengal-a Barasat leh Basirhat-a NDA candidate tan a campaign a. Thusawiin Pu Modia chuan NDA sawrkarah chuan eirukna lakah ngaihnathiamna engmah an nei lo tih a sawi.

Congress General Secretary Priyanka Gandhi chuan Himachal Pradesh-a Una district-a a campaign-naah BJP sawrkar beiin thil man sang tihnam tur leh hna neilote harsatna chinfel kawngah an hlawhchham thak niin a sawi. Nikum lama Himachal Pradesh-a chhياتna thleng kha rampum huap chhياتnaah a ngai duh lo niin a puh bawk a ni. Priyanka Gandhi hi Senior Congress leader leh Himachal CM Sukhvinder Singh Sukhu leh hruaitu dangten an tawiawm a ni.

<><><>

PM MODI ON PAPUA NEW GUINEA LANDSLIDE

Papua New Guinea-in leimin avanga chhياتna a tawh mekah hian sawrkar laipui chuan chhawmdawlina tur dollar maktaduai 1 a pe dawn.

Hetihlai hian Prime Minister Narendra Modia chuan New Guinea leimin avanga mi tam tak an thi chu pawl a tih thu sawi bawk a. Pu Modia chuan leimin avanga in leh lo tam tak a chhia leh nunna chan an awm chuan a rilru a tihnat thu a sawi a ni.

Puan tawh angina tun thla ni 24-a Papua New Guinea-a leimin Vanduaina thlenna hmun hi Enga province-a Kaokalam khuaah a ni a. Chenna in 1100 chuang leiminin a chhilh a ni. Papua New Guinea hi Australia hmarlama awm thliarkar a ni a. Hnam chi hrang hrang awmna niin tawng chi 800 chuang hman a ni a. Mihring maktaduai 10 vel an cheng a ni.

<><><>

NIA

National Investigation Agency (NIA) chuan mihring hmanga sumdawnna leh internet kaltlanga inbumna lama inhnamhnawih mi 5 a man. State leh Union Territory paruka police te nen tangrualin heng misual rualte dapchhuah beihpui thlak a ni a. An hmalakna hnuaiah hian hmun 15 an dap a. An mi mante hi Vadodara, Gopalganj, Southwest Delhi, Gurugram leh Chandigarh ami te an ni a. Rampawna hna zawn sak intiamin ramchhung thalai engemawzat an bum chhuak tawh nia thudawn a ni.

<><><>